

四庫全書

集部

欽定四庫全書

集部

靜修集卷十三

詳校官中書臣徐志晉

侍讀臣孫球覆勘

覆校官中書臣汪學金

校對官中書臣蔣寬

謄錄監生臣劉廷勲

欽定四庫全書

靜修集卷十三

遺詩一

元 劉因 撰

五言古詩

三十八首

四皓

二首

智脫秦網義動英主顏鬚眉不得見猶思見南山每
當西去鴻目極天際還馬遷歌采薇託名夷齊間孰謂
紫芝曲能形此心閑鄙哉山林槁搏也或可班安得六
黃鵠五老相追攀一笑千古浩蕩觀人寰留侯在漢

庭四老在南山不知高祖意但欲太子安一讀鴻鵠歌
令人心膽寒高飛橫四海北鷄生羽翰孺子誠可教從
容濟時艱平生無遺策此舉良可嘆出處今誤我惜哉
不早還何必赤松子商洛非人間

嚴光

文叔雖天子因陵位愈尊為陵成高節此亦天子恩兩
星映千古精爽如尚存有此謹厚者可贈狂奴真巢由
本不經怪妄徒擬倫中庸久蕪沒矯激非天民惟餘仁

義語至今凜若新想像富春石崔嵬猶起人

翟節婦詩

并序

昔金源氏之南遷也河朔土崩天理蕩然人
紀為之大擾誰復維持之者而易之西山乃
有婦人曰翟氏年廿餘其夫從軍死於所事
翟出入兵刃往復數百里晝伏夜行以其尸
歸負土而葬之既葬自以蚤寡無子遭時如
此思以義自完乃自決於墓側隣里抹而復

蘇終始一節今八十餘年矣夫人心之極有
世變之所不能奪者於此亦可以見之予聞
之為作是詩俾其外孫田磐刻之石或百世
之下有望燕山而歌予詩者使翟之風節凜
然如在亦庶幾乎吳人河女之章焉

兵塵浩無際烈女難自全婦人無九首志欲不二天燕
山翟氏女既嫁夫防邊一朝聞死事健婦增慨然生有
如此夫蚤寡非所憐求尸白刃中負土家山前事去哀

益深義盡身可捐無兒欲何為所依惟黃泉鄉隣抹引
決烈日丹衷懸誰辨節孝翁重賦睢陽賢我昨過其鄉
山水猶清妍聞風髮如竹飄蕭動疎烟千年吟詩臺我
我太寧巔為招馮太師和我節婦篇

太寧山有馮道吟
詩臺距翟居甫數

十里

燕歌行

薊門來悲風易水生寒波雲物何改色游子唱燕歌燕
歌在何處盤鬱西山阿武陽燕下都歲晚獨經過青邱

遙相連風雨墮崖峩七十齊郡邑百二秦山河學術有
管樂道義無丘軻蚩蚩魚肉民誰與休干戈往事已如
此後來復如何割地更石郎曲中哀思多

吳山夜雪圖

江南無寒歲一雪今幾時吳山豈無春畫此寒器安壯
哉萬里流不廢東南馳胷中謾長風俯仰今古非誰能
唱小海為和大江詞

白馬篇

白馬誰家子翩翩秋隼飛袖中老蛟鳴走擊秦會之事
去欲名留自言臣姓施二十從軍行三十始來歸矯首
望八荒功業無可為將身弭大患報効或在茲豈不知
非分常恐負所期非干復讎怨不為酬恩思偉哉八尺
軀膽志世所希惜此博浪氣不遇黃石師代天出威福
國柄誰當持匹夫赫斯怒時事亦堪悲

答樂天問

三首

二氣曰交感變態何紛紜清濁與厚薄賦與定難釣世

運如四時類聚仍羣分升沈與奪間今古亦難倫天道
自悠遠百年寓此身未來不可見既往有未聞愚者或
貴壽賢者或賤屯龍亢豈無悔躓屈豈不伸君自不知
此何云詰義文

邈哉開闢初造化惟陰陽錯然入形化一受不可忘稻
梁固為愛豺狼非故殃物理本對待生氣常相將孔聖
豈無後暴秦不可長鬼神禍福機昭昭亦可量桃鬻李
樹死城焚池魚傷外來非我取生意自洋洋君何不思

此徒欲問穹蒼

樂天種香草有艾同根株鋤溉兩相妨題詩問何如恨
君計已晚草草種樹初根荄不早辨使與莖葉俱鋤根
固相傷莖葉猶可除臭葉日以除香莖日以蘇區區彼
微根僅有知無餘雖霑灌溉恩生意已漸疏君今尚未
決歲晚益難圖

代來使荅淵明

何時發天目山中雲出時出山山更佳草木非所知公

田幸有秫何問菊與薇一笑領此意翁豈為酒歸

幽禽

幽禽初出谷其聲何熙熙但知春可鳴渾忘蟄凍時天生復天殺恩怨敢自私寥寥古人心世遠今誰知

寓意

萬木凍欲折中有天地春一無貫萬古生意誰能屯但苦未充滿此心終難伸秋風髮毛改卓爾顏色貧

又二首

愁陰翳陽景超然慕遠遊天風忽吹衣命駕崑崙邱冰
壺洗秋露霽月霜空流平生多故人回首生離憂
世路空嶮巖游子天一方況是青春深桃李爭芬芳相
媒有百鳥巧韻無絲簧客行雖云樂歸哉非故鄉

有懷

朝詠小招詞暮歌白頭吟出門何所適欲語誰同心豈
無平生交顏色非真金目送西南鴻令人思之深思子
不可置誰從懷好音年意惜已往進脩徵來今

獨酌

青山淡無夢相憶無由來每當西北風曠然開我懷為
從山中至對之舉吾杯主人有佳客此門容勿開

月下獨酌

佳月靜可飲一天明水寒餘光泛不極徘徊尊俎間但
覺涼露下不知清夜闌醉眠吾有興君當下西山

書堂谷晏坐

上負青天壁下引碧澗滋中有晏坐石日夕忘吾歸永

懷幽棲人千載誰與期人間九瀛海莽蒼天相圍黃塵
重如霧舉手不欲揮白雲如可招願作雙鶴飛

九日登洪崖有道士居此今二十年不睡矣

卑居不見秋登高自誰始清狂未免俗謹厚亦復爾山
光故相迎百步翠可倚屈指數勝游茲山居食指高絕
讓龍門平敞亦專美羣山渺波鱗天開見洪水列岳真
情塵遐瞰小千里却恐行路人視予旋磨蟻解衣林表
坐爛摘蒲萄紫甘漿來逡巡毛骨脫泥滓勝境得真賞

泉石迥如洗況有幽棲人嗒然空隱几相對已忘言一
笑雲林喜回首暮烟深高歌望吾子

游龍宮

翠澗如生烟石瀨欲無雪縱目失平地仰面猶清樾時
節未當春生意方暗泄隨時久閑藏與物今超越茲游
豈人力勝境殆天設拊石看棲龍髣髴仇池穴聞說如
桃源自古有深絕攝衣徑欲往不見當年轍獨立馭長
風哀歌山石裂

登聖泉庵

緩轡指西山振策凌崇邱臨風一回首擾擾令人愁蒼
石負崛崎碧草藉芳幽長林泛餘霽初節成高秋端居
氣始平頽然漸神游舉目欣所期叩心思欲酬為問石
上松千年為誰留飄飄巢居子歲晚同歸休

三月二十二日同仲韞飲北溪

分韻得却字

世紛謝已久恍若隔今昨惟餘北溪雲可愛不可却時
當持詩往報復亦不惡百年何將軍山林未寂寞北溪

擅佳名春服有成約頗聞張氏宅池館自疏鑿不須弔
鵝池且喜餘岳壑春風覺我來佳色動縈薄烟霏效奇
供乍喜復可愕顧盼不暇給遲回迷所託清泉會人意
愛弄入杯杓觴流水故遲歌發聲仍作野簌旋充盤舉
網聞魚躍生徒展餘敬賓主雜善謔圖畫沂上翁意象
窪尊酌蒼苔笑仰天微風蕩雲幕禽鳥過我鳴似語翁
正樂大笑昔人愚所見未脫略後來亦塵跡俯仰語成
錯人心妙無際崑崙復磅礴一元貫萬古普遍無郭郭

雅意不可言商歌蒲窠廊

源泉古北溪也金大行人張通古故居今為巫覡所據弔

鵝池見錢氏

弔右軍宅文

秋晚登西山

十日罷琴誦招搖慕飛仙
天風何許來吹我蒼崖巔
誰知此絕境秋華亦芳鮮
采采泛清尊山容變春妍
只應城中人遙知
美雲烟若見孤鴻來可咏
悠然篇

九日攜諸生登西山

九日秋服成童冠從我游
萬古清沂春重結
西山秋白

雲歸青岑狂瀾落滄洲永嘯長風來夾籟生崑幽清商
失搖落生氣浮林丘門生顧我言樂矣行歸休風袂尚
飄然此意浩難收

沙溝二詠

漱霞巖

丹霞凌日觀餘津浩難收蒼涼蘇病骨醉暈浮崑幽萬
象春意融頽然得歸休擾擾路傍子無勞歌遠游

飛泉亭

崦嵫多露草秋空挹飛泉胸中玉芙蓉滿意清冷淵火
食困煩鬱下顧心茫然何當分一杯洒落齊州烟

六華峰

入山採靈芝濯足東澗濱白雲不可招丹霞有餘津長
風忽絕頂悠哉凌翠氛舉手問浮世此子今何人

寄宋生

西南吾楚澤吞三江五湖眼中此尤物不可一日無有
客報渾一胸次如還珠望極不可到逸興風飄裾家人

笑挽之恐遂凌空虛寄聲宦游子歸與江山俱閉門望
雲濤屋梁雙月孤西陵斷已蜀南雲渺蒼梧徑圓一千
里杯酒納有餘新詩想瀟洒典氣餘清臞明朝函丈中
坐對江陵圖

送劉校書回

祁陽堯故國淳朴餘山川每見祁陽人心如對堯年而
况賢宗盟久矣相周旋今年護我歸青山照華巔處我
既以禮贈君無可言言動戒在戲當誦東銘篇

李伯堅宣慰荆南

并序

李公伯堅幼以世家子入事北安王來典保定蓋為王守分地也安靜樂易屈已下士郡嘗被水災力請於朝多所蠲復郡人賴之為郡五年王朝京師有司被王教宜奏公宣慰一道至元二十七年二月十五日詔下當往

荆湖保府諸公賦詩為贈郡人劉某為之叙

荆南壯哉郡作鎮多英奇三年廉相國千古甘棠詩聞

公相國客荆人恐來遲公來何所望望如相國慈有子
父乃顯觀臣王可知榮親與報王勉力在此時

凡物

凡物能振厲即見生意融慢氣或少施衰颺不自充志
至有定位敬勝多奇功強哉復強哉德業將日隆

植榴

植榴將食實三年不見花日夕灌溉勞物情自可嗟今
朝兩相忘靜綠清且佳二嘆詠此意不覺芳陰斜

學東坡小圃五咏

枸杞

仙苗被城郭聞之杞國人始疑制名初義與荆楊均遠
慚勾漏令空望黃河濱常山古靈潤烟霞流餘津青萸
發丹乳厚餉謝我神世人厭肥膩思與雅淡親客來薦
蔬茗用以華吾貧方書自有本疑信未敢真偶思青城
山山人壽且淳手持羲皇書念此區中民

地黃

山行多上藥地賤民亦辱村民誇善染功能竟誰錄仙
翁種藝法隱處未成卜旅居容少試膏土果深斲頃筐
如有秋靈液光潤屋俯鑑盆影中華髮已成綠九醞謝
清泉隣牆浥餘馥朝陽發蒼涼與世解醒毒元氣久蕭
索內熱紛相逐黃鵠憑寄聲山中酒方熟

甘菊

金行發黃素風露饒甘馨政使非上藥猶當克前庭對
花誦陶詩持詩問淵明帝鄉不可期安用制頽齡忍饑

啖松栢直以奴僕輕東坡豈忘言空腹嚼落英采采還
自笑君今何所榮無病不服藥邵子有深情壽夭付天
公歐陽差失平吾心在蠲疾持此報兩生

薯蕷

玉延事韜養朽壤深以密短援受柔條葱鬱護風日貧
居乏肉味勞力苦羸疾松聲泛綠畦夢聞石鼎溢初疑
湯餅滑乍見晴雲出和飲宜杏酪煎糜縷崖蜜餉隣報
吹芋留客代煨栗入藥宜自掇留種戒勿失奇人分嘗

薄計用今六七靈物聞善化慎勿輕呵叱

黃精

黃精晚得名丹家貴朱章藉藉仙經中參朮避華藻名
高有物忌榛莽幾摧倒春風入溝畹英翹忽已好感子
灌溉恩糜身錫難老豈無難老願所願在探討世變閱
無窮乾端見更造此志理難遂歛之寄襟抱釋爾任重
憂歲晚共一飽

靜修集卷十三

欽定四庫全書

靜修集卷十四

元 劉因 撰

七言古詩

三十二首

送徐生還鄂

并序

江夏徐生東湖故家庚申北渡客燕趙十七年而宋亡其子姪書來迎之而還蓋前所謂黃鶴歸來疑城郭之猶是浮雲一去惜人代之俱非者也諸公賦詩以道其行命容城

劉某叙而倡云

燕山送客歸南州興來每恨無扁舟君歸為我謝江漢
思君不見令人愁千里風烟想瀟灑一代英雄成古邱
當年才氣鸚鵡洲撫掌笑殺黃鶴樓黃鶴歸來哀江頭
江山依舊人悠悠浮雲萬古恣變滅眼中擾擾何時休
紫陽仙人歌遠游飛蛟起滅三千秋為君揮手崑崙頭

紫陽謂晦翁飛蛟
起滅見遠游集注

蘇吾王翁畫像

并序

蠡吾王翁世為農家多蓄粟金源貞祐初宣
宗南渡河朔大饑翁於是發之全活者甚衆
時鄉豪在所皆自樹慕義者咸欲推公為首
翁不許挈家避地扶溝餘二十年而汴亡天
下蕭然蕩為邱墟翁家獨無恙而歸子孫讀
書不求祿仕三世皆以壽終殆不偶然也翁
之曾孫天輔求予叙翁之行義於其畫像謂
庶幾能聞之名士大夫而有以發潛德之幽

光也

北門翠屏雷破山畢逋頭白五馬遷乾坤運會到血肉
有欲脫之誰飛仙河朔諸州尤可憐有饑一來無此年
鄉閭嗷嗷公哺之公困有底心無邊諸豪推唱彼亦義
亂世性命公能全教子讀書不求官歸來素髮家山前
天理不隨陵谷變坐看老樹生蒼煙只今圖畫對公像
回首兵塵一慨然誰能生死太平日白石共煮西山泉

宋徽宗賜周準人馬圖

筆底金鞍有蕭爽誰云不博降王長汴梁門外若雲屯
畫本相眉應自賞十載青衣夢故都經營慘淡欲何如
只除金粟呼風鳥曾見昭陵鐵馬趨

宋高宗題李唐秋江圖

秋江吞天雲拍水濤借西風挾不起斷雲分雨入江村
回首龍沙幾千里澹庵老筆搖江聲髣髴阿唐慘淡情
千秋萬古青山恨不見歸舟一葉橫

宋理宗緝熙殿硯

使君持送緝熙硯捷音才到山中人四十三年如電抹
此硯曾經秋復春寂寞經筵勸講臣詩酒宮中樂事新
文章只數天中月萬卷何曾筆有神

宋度宗熙明殿古墨

江南賜姓功臣李吾州奚生墨工爾江南赭盡吳山松
吾州老樹搖晴空君王弄墨熙明殿不覺江頭度白鴈
劫火猶解愛庭珪吹送山家易水西松風含哀生硯滴
似訴優游解亡國只今誰有哀江南寶氣不受鵝溪縑

早晚扁舟適吳越為君揮洒天門雪

金太子允恭墨竹

黑龍江頭氣鬱葱武元射龍江水中江聲怒號久不瀉
破墨揮洒餘神功天人與竹皆真龍墨竹以來凡馬空
人間只有墨君堂何曾夢到瓊華宮瑤光樓前月如練
倒影自有河山雄金源大定始全盛時以漢文當世宗
興陵為父明昌子樂事孰與東宮同文采不隨焦土盡
風節直與幽蘭崇百年圖籍有蕭相一代英雄誰蔡公

策書紛紛少顏色空山夜哭遺山翁我亦飄零感白髮
哀歌對此吟雙蓬秋聲蕭蕭來晚風極目海角天無窮
黑龍江見金史幽蘭軒義宗死所汗亡張蔡公以金寶
錄歸遺山嘗就公勝錄此軸亦公得于汗之中秘者公
之子仲仁持以求
予詩故終篇及之

白鴈行

北風初起易水寒北風再起吹江干北風三起白鴈來
寒氣直薄朱崖山乾坤噫氣三百年一風掃地無留錢
萬里江湖想瀟洒佇看春水鴈來還

渡白溝

東北天高連海嶼，大行蟠蟠如怒虎。
一聲霜鴈界河秋，感慨孤懷幾千古。
只知南北限長江，誰割鴻溝來此處。
三關南下望風雲，萬里長風見高舉。
萊公灑落近雄才，顯德千年亦英主。
謀臣使臣強解事，枉著渠頭汙吾鼓。
十年鐵硯自庸奴，五載兒皇安足數。
當時一失榆關路，便覺燕雲非我土。
更從晚唐望沙陀，自此橫流穿一縷。
誰知江北杜鵑來，正見江東青鳥去。
漁陽撾鼓鳴地中。

鷓鴣飛滿梁園樹黃雲白草西樓暮木葉山頭幾風雨
只應漠漠黃龍府比似愁岡更愁苦天教遺壘說向人
凍雨頑雲結淒楚古稱幽燕多義烈嗚咽泉聲瀉餘怒
仰天大笑東風來雲放殘陽指歸渡

過易州登西樓

秋氣壓山山欲摧西樓正有詩人來悲歌感慨聊一發
萬古抑鬱今崔嵬寧山為有瀛王臺頑癡至今如死灰
幽燕勁氣老益壯北山飛翠來吾杯

登鎮州隆興寺閣

太行鱗甲搖晴空層樓一夕蟠白虹天光物色驚改觀
少微今在青雲中初疑平地立梯磴清風西北天門通
又疑三山浮海至載我欲去扶桑東雲華寶樹忽當眼
拍肩愛此金仙翁金仙一夢一千載騰擲變化天無功
萬象繞口恣噴吐坐令四海皆盲聾千池萬沼盡明月
長天一碧無遺縱我生玄感非象識此眼此臂將安庸
海岳神光埋禹鼎人間詭態何由窮金天月窟爾鄉國

玉毫萬丈須彌峰一杯徑欲呼與語為我返駕隨西風
堂堂全趙思一豁江山落落吾心胃中原左界此重鎮
形勢彷彿餘兵衝歌舞遺臺土花碧旗幟西山霜葉紅
乾坤割裂萬萬古烏鳶螻蟻為誰雄滹水悠悠自東注
落日渺渺明孤鴻

乙亥十月往平定早發土門宿故關書所見

風煙全趙如平掌失脚山城夢猶想土門一縷漢時天
萬古行人為誰仰指似勅敵談笑中為狀羸僕忍寒強

當年鼓角如可聞，急着清吟和林響。遠山宛欲來相迎，
近山留人屹相嚮。或從井底忽登天，倚伏已能先想像。
平生愛山真惡識，今日果為山所網。昨朝乘翠擁脩眉，
最恨高樓負清賞。壯懷鬱鬱悶欲絕，安得凌風恣吾往。
天教石頂放一頭，駛若驂騑脫羈鞅。山靈努力出奇供，
只恐先生駕虛枉。萬壑霜松動悲嘯，極目雲烟埋闕
北。門形勢護中原，辨與姦雄增技癢。太行橫絕半九州，
留在平原幾塵塊。何人為我起六丁，差我盡隳天宇朗。

千年再挽神禹功恍若鴻流開四象

范寬雪山

老寬胷次無墨汁經營慘淡寒生鬚秦川名山古壯哉
況復玉立千尺孤安得辰光蒲東壁試看龍燭崑崙虛
赤塵鴻洞天為爐一丘一壑真吾廬眼中人物誰冰壺

灞陵圖

灞陵平生有詩境黃閣何物為清風鄭五自知非相才
獼猴枉畫凌烟中作傭莫作詩家傭百為淡苦誰汝供

古人星露尚有戒况是風雪來無窮
襄江明日蒲萄暖
斜風細雨船頭轉門前暮雪吾不知
坐上春風人未遠

趙生水墨虎

南山鬱鬱烟霧濛北山落日薄幽叢
先生眼花臂猶健
聞虎有真心愈雄聲絃寄自黃蘆東
人言此是高堂中
仰天大笑出門去時危慘淡來悲風

仲誠家藏張蔡公石女剪製香奩絕巧持以求

予詩

靜華墨君天下奇陵川仙人為賦之遺山野史誇慧女
萬古春風蝴蝶詞豈知此巧復絕代夜月靜拂天孫絲
夢雲絲雨有形外郢斤庖刀無心時蔡公凜凜褒鄂姿
諸郎畫戟清香詩香奩秀發亦餘事詩人饑眼省見稀
敲門青燈爛紅碧布衾驚走惡睡兒破屋猶疑翠鯨怒
短褐誰憐紫鳳移東家健婦把鋤犁西家處女負薪歸
哀哀正念誅求苦對此無言空淚垂

張元帥寶刀

土不產金人氣雄真人握鐵開鴻濛不知此刀何所得
風煙餘烈來霜鋒將軍聲名今蔡公酒酣過我歌彤弓
持刀對公兩奇絕眼中已覺江南空水波江聲浩無窮
朝磬夕淬天有工回鶻健兒戲天巧前身鐵精非凡庸
紫烟焰焰天為紅鑕紋秀發青芙蓉寶鏤搖落初開封
四壁如著清水中天山積雪聚銍鏐寒色直欲朱崖通
摩挲神物三太息此行善保千年功

山行見馬耳峰

近山豪士少羈檢酒澆不下曾崔嵬遠山靜女亦閑雅
尚恨少有傷春懷亂山來聚爭拱揖武卒侍婢皆几材
天知老眼不受塵路轉忽睹雙峰開雙峰何年聳雙耳
叱之不動煩風雷今朝向我効神駿翠色欲逐神鞭來
浮世浮名酒一杯我欲駕此觀蓬萊只愁日暮三山上
黃塵回首令人哀

雪翠軒觀太寧谷

吾家雪翠天下白銀河無聲月無色天關不閉寒崢嶸

箕尾晶英凍將折帝遣六丁下取將勅賜名軒換金碧
初如紫霄蟠青雲飛下人間作堅壁漸如扶桑六龍出
萬縷丹霞吹海立何人辨此女媧氏補天重煉蒼蒼石
陽能兼陰今可知祝融若并立冥國正教蕪穢洗欲空
誰為千年棟樑惜殺機如火出至微焰焰寧知有今夕
軒中高卧劉更生願借餘光照方冊方冊有道出黃虞
今古煌煌天與極火耕明日千萬斛酒瓮已聞春雨滴
不妨一飲盡羣山醉暈春生半天赤

雪浪石

邵家水陸說影象一物自可涵無垠滄浪仙人歌感應
石中固有此理存老坡胷中如此幾硯磊須得銀河噴
嘲嵩唾華天不嗔武夷赫怒張吾軍偶從北海得生氣
竹石也愛風姿新我來正當秋雨霽一杯真漢玄都門
小璫好事如先臣坐令平地石生根渠家兒戲解忘國
作詩一笑君應聞

烟霞觀雲巢松

盤柯盤屈今幾時龍攀虎踞森英姿道人眼中無可怪
一巢見餉吾何疑我所思兮願與箕秋聲瀟瀟吹送之
清風一枝雲一席松中之樂天不知靈臺方寸有君節
虛籟萬古絃吾詩歲晚相期君與我笑拊吾髯盡此卮

瘍醫詩卷

煉心如石補天缺煉心如泥補地裂白墓正飽丹鳳饑
心能竹實亦能鐵乾坤瘡痍今幾年誰家藥籠金石堅
千金此方不一試雲山注目秋風前

明河秋夕圖

明河澹澹縱復橫行雲悠悠度疏星鳳媒不來烏夜驚
瓊枝玉佩遲所託畫中隱隱聞機聲秋來秋去今猶古
此恨不隨天宇青崑崙西頭風浪平辨我一舟蓮葉輕
浩歌中流擊明月九原喚起嚴君平人間此水何時清

美人

美人娟娟秋水隔烟霧深沉蒙玉質目逐晴波去不歸
遙山只有行雲碧碧雲日暮心悠悠窓前一夜梅花開

平生自信心如鐵一寸相思一寸灰

玉簪

春色醉人人未醒獨憐月露秋零丁
昭陽日影巧相避寸心未減寒泠泠
只應得我一顧足為君小醉秋風亭
蓮兄君子菊弟隱何物處君君意肯
玉簪玉簪誰與簪蒼苔疎雨秋欲深

荆南送橘

江淮草木少生意今日佳果來何奇
枯苗一溉自此見

入手即有甘棠詩眼中風露瀟湘姿渺我幽林千樹思
只恐江聲撼吾枕相看對坐寒更遲

食笋

夢迴齒頰風蕭騷幽姿不許霜松高南來蒼玉不盈束
已覺飲興翻雲濤詩家曾次自宜此尚嫌烟火須烹烹
想像南風吹萬竹籜龍正恐稱冤號石盆養魚心自苦
仰羨鸚鵡雲間巢眼中歲旱土不膏長鏡後慮山無毛
退食歸來北窓夢山巔朱鳳聲嗷嗷

王君奉命賑濟彰德過予求詩

十年監官窮到骨一簿武邑如登天
巧官紛紛日九遷
白髮青衫獨可憐
昨朝讀君阜民篇
善察物情亦已賢
南郡饑民想更苦
以君賑濟非偶然
驛傳星馳乃爾急
何暇載酒揚雄玄
茅容問稼當有語
野夫憂國願豐年

送寇長卿同知岳州

聞君得官岳樓去
我夢已落江湖濱
天下先憂付公等
江山之樂當年分
荆湖一城百戰得
存撫安得人人君

岳陽父老宜相賀君是荊州舊幕賓

廬荊州治稱第一

三月三日許天祥置酒東城

都門氣習豪翩翩此君尊俎今宛然
春色今年遲半月留待忽忽過寒節
臨流雅唱尋舊盟青眼青天對今夕
橫橋綺服麗人天蒼苔坐我羲皇前
花枝華髮兩如許天意時晴一杯舉
安石起舞元龍歌蒼生我竟如渠何

飲仲誠椰瓢

君家瓠落無所容江湖誰辨平生胷
海南佳氣久鬱塞

灩澦似喜今相逢前年對酒面發紅今年對酒氣如虹
江山萬古騷人國跬步便與華胥通河間古儒病我拘
聞我一飲喜氣濃平生得意南湖張此意頗與河間同
太古窪尊老無底一朝傾倒何由供醉鄉千年有此客
烏歌蝶舞春濛濛醉翁之意不在酒宛如琴意非絲桐
太和風境無醕酲洛陽樓閣高玲瓏冷然仙馭一杯水
眼中渺渺無極翁西家伯倫替且聾東家醉死王無功
酒中醒境渠未識冰壺秋月崑崙峯舉杯喚月來胃中

人間白日浮雲空五嶺山高雲幾重朱崖滅沒南飛鴻

玄鶴翩翩渺何許操瓢徑訪眉山公

河間謂趙王南湖謂仲實冷然仙馭

一杯水見瀋延之和茂叔憶瀛溪詩洛陽樓閣堯夫空中樓閣事

南溪行

老人耕牧南溪南南溪草淺牛所貪大孫攜書小攜酒
青蓑為席樹為庵以書教孫仍自讀隔溪遙聽聲誦誦
牛眠樹陰孫勸酒老人未醉意已酣老人氣高軀幹小
面狹於髯森若杉年周甲子辰又浹世故十率八九諳

早歲精勤傳世業口誦太素手弄甘以藝發身寧久屈
安車徵起詔使監入為天子侍從臣龍沙萬里嘗陪駢
鼎湖白雲望不極招之歸來山有嵐身出夢關涉覺境
人間萬有皆空函侍從之名不復記老人自署南溪街
呼兒來前雙玉立曰我愛汝擇所堪自我中年學讀書
方寸若有神明鑒活人之功豈不美一有不中中或慙
青囊祕封不再展塵跡從此乃一芟讀書力田兩交進
困有所收心有函開此樂國自我始繼而大之在汝男

我今已成齊變魯汝等當為青出藍東北一舍容城翁
今年卧病家山巖其室雖邇人甚遠汝糧自裹登汝檐
雪中欸段來叩門僕夫汗流扶酒甌侑尊有物随土產
厥包雜進鴨與鷓飲劇談發不自禁四隣驚走來窺探
先生靜默如土鍾叩之愈大聲愈闕今朝音吐瀉河漢
老人者誰開其緘斤之令去不復語興亡萬古手與談
空鉤意釣不在綦澹然相對如禪龕老人思家不可留
二兒扶歸杖几叅臘醅開時魚可膾相約載酒游溪潭

雜詩二首

先天漆硯詩

井序

予近得漆硯二劉文茂之所惠者象壁水
而先天八卦周焉予遂名以別之且賦詩
以答茂之云


揚雄久寂寞載酒誰相過今夕是何夕燭花吐焰浮煙
蘿天開氣機動起舞獨婆娑晨光滿壁佳氣集客來怪
我哀顏醜袖中隱隱天根雷欲出不出神所訶硯漆未

為貴形古天森羅夜月碧落影秋風寰海波茫茫兩儀
根日月東西柯環中方寸地樂境涵天和弄丸恣遊戲
觀物供研磨平生犀革編退筆如山阿成都墨池自尚
玄劉歆舊瓊空作魔今朝得此天所戲令人一歎三摩
浮扶搖子安樂窩老氣鬱鬱卻日戈鞭霆烈月未消歇
百年光景空蹉跎冥漠神光恍猶在松風入墨如吟哦
東南澤國尾閭瀉西北仰看青山多青山天齊石可磨
安得六丁為我隳峩我我欲萬年老筆回江河先生興

來不奈何為君醉草太古滄浪歌

示孫諧

龍山古壯哉鬱鬱盤烟嵐一讀元子詩冷然玉泉甘江
山勝境要佳客而我不到懷應慙雷家髯翁虎眈眈劉
氏遺愛存河南百年喬木動秋色籃輿誰與供奇探崑
山出美玉楚國多梗楠孫郎復貴種良璞須深函勾萌
慎培養雲霄看崑崙野夫老矣一何拙平生只有歸休
堪傳經訪道可無愧為我早辦龍山庵



靜修集卷十四

欽定四庫全書

集部

靜修集卷十五至

詳校官中書臣徐志晉

侍讀臣孫球覆勘

覆校官中書臣汪學金

校對官中書臣蔣寬

謄錄監生臣劉廷勳

欽定四庫全書

靜修集卷十五

元 劉因 撰

五言律詩

三十八首

書堂旅夜

大室不自掃寸心徒爾豪
世途仍險阻風物故蕭騷
皓月霜流淨明河天放高
空庭一片石獨坐首頻搔

過唐水望堯山

神化大無外名山能幾峰
威顏渾咫尺天日尚雍容
蒲

坂堪饑死重華有舊蹤三謨讀未老於此卜巢松

過奉化先

閏遠承宋統此志亦雄哉置縣名猶在因山勢已摧百
年元魏史千古汝南哀華表鶴應有悲風海上來

雜詩 二首

聞昔飛狐口奇兵入擣虛人才九州外天道百年餘草
木皆成騎衣冠盡化魚遺民心膽破諱說戰爭初

關嶺通山後風謠採路傍地寒人好毒草淺畜宜羊用

水如奴婢從川貯米糧西風如有約乘興即吾鄉

野興

莽莽榛蕪路蚩蚩魚肉民乾坤幾逐鹿今古一傷麟
眼底人間世胄中物外春江山滿花柳無負百年身

秋日

山人久不出今朝天氣清秋光濃可掬草色翠相迎
捫蝨暮山碧敲門新筍生歸來重回首佳處未忘情

山中憶故人

故人南郡去消息久無聞
瑶草正堪種白雲誰共分
屋梁驚落月鵬翼賦垂雲
歲暮一樽酒高歌如見君

夢採松脂及甘菊

棲遲負松菊夢寐得甘馨
逸逸喜同臭流高味獨青
人誰借三徑天欲制頽齡
毛骨清猶在枕邊霜露零

種杞

法出千金要畦容一席
分灌苗身已健採實夢先勤
白棘憑誰辨靈苑只自聞
知音九節杖惟有華山雲

戲答人送鹿皮冠

麋鹿山林性文章冠冕材頭顱如有此巖穴更悠哉老
筆天機在空梁月色來桃椎應似我人世莫驚猜

觀藥爐自戲

無病不服藥

康節語也

此懷清更嘉歐陽或有道韓子豈無

瑕羸疾嗟予久名方信彼誇回頭謝鷄犬何日是仙家

退之服硫黃一疾訖不痊樂天詩也赤松共游也不惡
誰能忍饑啖仙藥已將壽夭付天公彼徒辛苦吾差樂
東坡序歐陽子語也

地髓服仙草黃精失採花徵求遍親友炊爨罄樵車屢
敗從人笑偶成容我誇側聞僮僕語辛苦是仙家

閱竇氏名方

人從大節論士尚絕無求獻可有先見老泉多遠憂方
書空物齊耆舊盡山邱矯首候斜日窓中倦鳥投

眼醫詩卷

火景元中暗月光徒外明每當天抹漆未便目無睛暗
自何年有明從底處生若知當告我心事在蟾精

褚母節孝詩卷

寂寞吾鄉國才難婦愈賢題評慚我後旌表聽人先艱
苦初心盡安榮老境偏幽潛天有待留看百來年

張監院過

有客敲門久山人與鶴歸論文翫草本換酒當蓑衣暫
會還成別相歡且莫違明朝誦佳句北望謾依依

寄彥通

吾子今應健山人老已癡迷藏高着眼興廢大觀棊感

遇渾非昔忘懷若有思絃歌吾舊隱寂寞暮春時

送友生

無人慰幽獨之子罷登臨野鶴籠中態翔鴻天外音吾
儒關世運晚節見初心有問山間事白雲今更深

盧學士按察江東

不廢芻蕘賤狂言試一聽品題傳月旦言動律東銘飲
少得真樂吟多損性靈清燈四書外澹泊養遐齡

郭判官按察廣右

謝病三公掾分司五嶺南柱山天下秀憲府百僚叅夜泊防風浪晨征避瘴嵐遙知慈母念先汝過湘潭

張察院分司臨安

餘杭古佳麗御史重分司甘旨足為養江山能助詩梅花春早晚潮候月盈虧糾察先從此陰陽恐失宜

送仲常游北岳

大茂玄都閔它山拱萬靈風霆凜神化河海盡襟形昂畢空留影幽并未了青追風王制變儲祀世塵腥禮樂

心雖切煙霞骨有銘長懷七十戶為我謝仙扃

送郝季常赴正陽幕

上黨清涼界超然慕白雲名家得之子勝境苦平分鼓
角生新壯詩書失舊勤江淮古形勢有樂在從軍

送成都術士

邵子不言命相逢盡此觴風煙雙白鬢身世一青囊玉
壘浮雲變峨眉落日蒼西游吾有意先為謝嚴揚

宣慰孫公慶七十詩

并序

至元二十七年冬與處士張君察院張君提
舉郭君都事張君飲教授趙君所工匠提舉
孫謙繼至察院曰是家古世官也將甲氏四
世矣今其翁正議公階是為宣慰使歷事四
朝登秩二品有子若孫皆佩金紫開歲七十
尚躍馬不哀維爵與齒實一鄉之望凡所與
游禮宜往慶在吾輩慶宜有詩於是約各為
詩一首言韻古律不拘既成俾諸孫捧觴歌

以獻壽公宜每篇為盡一觴不辭十二月二

十九日樵庵叙

為仁存世職得壽見陰功家產千金厚官銜二品隆子
孫皆貴顯飲啖尚豪雄五福誰全備吾鄉有此公

何太夫人壽

二首

近親宜致敬結友合升堂薄俗隨遷變淳風墮渺茫吾
人今復古此日得稱觴高詠靈椿句燕山暮色蒼

去歲稱觴後今朝重過庭將軍不好武宅相舊明經拙

宦供行樂忠臣見典型北堂多竹石歲晚亦青青

示張源

堂高餘慶在道重魯齋傳洗眼名家後驚心大學年白
頭負風鑒青佩見時賢明日鹿門隱須君拜我前

哀徐生

去歲登高句霜楓秋幾多東籬成惡識西郭動悲歌天
道憐渠在吾丈奈爾何送君紅樹下風葉尚吟哦

生且死求

予銘為不朽計東

籬事見擊壤集

烏庫哩顯之母夫人挽章

冠帔金源舊門闌戚里榮鶴悲人世短銅泣露槃輕往
事驚波去新墳宿草生烏啼原上樹霜月有餘清

侍其提學哀挽

初遠過庭訓擇隣得子賢春風渾一月恩制欲三年步
武思猶在頭顱愧所憐念親仍感舊欲語淚如泉

名醫張國綱挽卷

良醫不出戶真隱要逃名宿草今如此春風宛若生一

囊三世藥兩子萬籬金平昔憂多病懷賢倍有情

劉仲文挽章

并序

仲文名郁析州蒲陰人少從事亳府軍謝病
歸杜門不出以春秋左氏學為業所居里名
黃臺因以為號後仕京師為將仕郎年六十
餘命酌賦詩而終子元今為太常奉禮郎

楚塞十年役黃臺一室春從軍有何樂學道不知貧生
子為名士居鄉稱善人死生無所恨今古一邱塵

感事

間氣來西極逢時稱世賢學隨人望盡家要後生傳魏
野赤松句堯夫樂社篇卜隣

闕

聞訃重淒然

贈答徐生

三年不窺牖城府有山深於道無少得多君肯見臨一
盃上池飲千古水仙音為子終宵話相期勞寸心

七言律詩

三十二首

晨坐

共笑龕中坐已癡環堂燈火誦聲遲人才興替世所係
甌水溫涼天可知差健每因多病後一寒偏怯欲明時
三年馬隊成何事採菊南山舊有期

與客會飲野亭

遙岑一碧淡相依野態行雲共意遲多病留侯寧復偉
長身諸葛但如癡相思十里尊酒盡永嘯一聲小鳥愁
風袖翩翩似何處青林西北雨來時

過徐橋

老岸石欄曙色分只疑身是入山雲十年往事不回顧
百里清泉如可聞人世誰教有長路坤靈終亦化塵氛
興亡更遣陂塘在幾欲悲歌酒未醺

白溝

寶符藏山自可攻兒孫誰是出羣雄幽燕不照中天月
豐沛空歌海內風趙普元無四方志澶淵堪笑百年功
白溝移向江淮去止罪宣和恐未公

過東安趙宋先塋

五季風煙慘畫靈渠兒有志亦雄哉累朝禪策皆虛器
千古黃袍又厲階文物漢唐今已盡史編南北更堪哀
荒墳一品知何處猶遣石麟草半埋

過東安

干戈天亦厭紛紛豪聖十年共幾君太祖無心亦徒說
吾兒有志更誰云悲歌莫管千秋後王氣應無一品墳
今古區區等如此五陵哀雁入秋雲

登武遂城

神州英氣鬱高寒臂斷爭教不再連千古傷心有開運
幾人臨死問幽燕平生卧榻今如此百萬私錢亦可憐
咫尺白溝已南北區區銅馬為誰堅

登中山城

黃金一夕冷如鑛劉項蕭然恐未真世事惡盈應有數
天心撥亂豈無人陵遷谷變橫流地卵覆巢傾死節臣
毛髦諸孫生氣在九原精爽凜猶新

予曾伯祖奉議府君貞祐初死節中

山而舉
族沒焉

望易京

龍山西下鬱岩光，還我燕南避世謠。
天作高秋何索漠，雲生故壘自飄蕭。
誰教神器歸羣盜，只見今人泣本朝。
莫怪風雷有餘怒，田疇英烈未全消。

七月九日往雄州

秋聲浩蕩動晴雲，感慨悲歌氣尚存。
洒落規模餘顯德，承平文物記金源。
生存華屋今焦土，忠孝遺風自一門。
白髮相逢幾人在，蒼烟喬木易黃昏。

武陽故臺

仁義徒令此古存
轍環初不抹紛紛
天公欲為秦漢計
野色更無燕趙分
滿眼兵塵餘故壘
一聲樵唱入秋雲
擬乘碣石觀滄海
易水東流去不聞

鄉先生漢韓太傅嬰墓

章句區區老益堅
百年軻死已無傳
四詩今併毛公廢
三策聊存董相賢
祀典曾聞鄉社在
荒墳重為里人憐
絃歌燕趙今誰見
高咏周南獨慨然

定興文廟枯杏復花其尹求詩

吾縣奉議
府君故治

手澤天教櫓葉存窮鄉枯朽亦霑恩敢將吾道論榮悴
且喜甘棠見子孫但使儒林有根柢會看寒谷變春溫
題詩當作諸公唱百里東州又故園

宿華陽臺

石徑盤盤擁亂霞雲間雞犬是誰家空山月出人境失
高樹露涼秋氣加蜀道青天休種杞武陵流水漫尋花
太行東北三千里盡借晴嵐染鬢華

又

夙志經綸尚未乖
消人閒去只蓬萊
龍門正要書堂在
天柱誰分戶帖來
雲外久遲黃鶴至
夢中曾採紫芝回
秋風何日飛來得
重勉移家載酒陪

飲聞雞臺

出門人事厭紛紛
春色三分已二分
十步離山九回顧
一杯到手百無聞
蒼茫天地有如此
磊落古今何獨君
欲向荒臺問遺跡
水明沙浦只行雲

宿鄉僧致公房

倦客歸來借夕眠，偶因相敬識君賢。
常思有酒邀陶令，每愧無衣謝大顛。
謂暢墨名聊汎應，論周陰助豈誠然。
平生親切冠巾語，欲發還休亦可憐。

九月晦日過鎮州宿趙徵士皇極道庵

慘酷姦訛禍世親，翁張那復見真淳。
歲來龜六終留殼，調中狙三已自塵。
符藥真能度褻俗，樵漁却恐有幽人。
摩挲石刻皆名筆，庭下寒花不似春。

道庵取象
龜歲六

宿趙山人房有懷

書劍南游氣吐蜺歸來華髮首難低江山應識千年鶴
豪傑空慚半夜雞物外有天藏太古人間無地種丹萸
相思日暮一杯酒望斷碧雲何處棲

宿龍宮

擬欲題詩贈白雲且傾濁酒洗塵氛閒將談笑論當世
卻喜稱呼是隱君天柱舊曾分戶帖神林今又有移文
夜深長缺悲歌罷此曲山靈恐未聞

玉乳峯

亂山如擁欲爭先，惟許孤峯入馬鞭。
舊見劒光曾犯斗，誰教箭筈亦通天。
只應絕頂十年石，中有齊州九點烟。
安得凌風乘此去，東游滄海看桑田。

洪元宮

明日擬到天城

樹邊平野接晴霞，腳底清江走白沙。
方外道人留客住，門前塵世倩山遮。
自慚爛賞無多暇，更有行窩第几家。
烟雨兩坡皆古木，興來便作上天槎。

唐張忠孝山亭故基

斷碑藩鎮記當時杯酒談兵少牧之山色何曾間今昔
人才初不限華夷水波風起心猶壯木杪秋生鬢已知
莫更候雲臺上望武陽禾黍亦離離

雙清空堂遺趾

心遠由來地自偏若分心跡已非賢結廬人境元無害
跨鶴揚州更兩全石頂經龕有隨處山中學館竟何年
馬頭果要為初祖擬問西巖借一廛

張氏西園

水府生烟晚更蒼翠陰含雨暗生涼人間豈有赤松子
天上應無綠野堂一日平原驚客散千年郭隗入臺荒
誰教老樹夕陽在留與憑欄遣興長

賈氏溪堂

澹澹春波遠更宜邱山華屋搃成非來今往古年華在
厚地高天人力微世上紅塵無此客杯中明月有清輝
燕南盛事君須記曾為東湖盡醉歸

憇謁山寺

石田霜落晚蕭騷一徑禪扃亦自高
九萬里風安枕駕三千世界等秋毫
山哀自苦天相罩秋老不禁詩太豪
西望雙龍有高隱結庵終擬近林臯

會飲北山

相逢相飲莫相違往事紛紛何足悲
別後幾經滄海淺歸來豈止昔人非
此山變滅終如我後會登臨知與誰
今古區區等如此不須辛苦嘆斜暉

暮春山游

萬山傍遶翠爭新
兩澗平分月有鄰
木杪柴閨如看畫
松陰苔徑欲凝塵
浮雲柳絮人間世
流水桃花物外春
杯酒狂歌極浩蕩
野烟晴樹望中勻

春日游山

川氣迎晴濬作春
泉聲招客浩如神
隨時俯仰有魚鳥
乘興往來無主賓
碧水白鷗心共往
浮雲蒼狗態誰真
平生經濟程夫子
年少看山意已新

不是吾儒本經濟
等閒爭肯出山來

明道少

作也

西山雅會

山色舊無今日濃
雅期新得與君同
曾懷霽月千年後
尊酒春風一月中
靜裏乾坤無彼此
眼中花柳各青紅
高情久已忘琴了
誰管殘陽送去鴻

水北道館

會從氣朗看春朝
始信蘭亭水石遙
物外壺公能避世
山中巢父不知堯
波間明月隨吾取
松上白雲如見招

曉策重來有成約無妨談易對漁樵

静修集卷十五

欽定四庫全書

靜修集卷十六

元 劉因 撰

七言律詩

五十九首

有懷

百年身世付秋毫
萬里雲霄有羽毛
樓上詩成山欲動
眼中人去氣誰豪
崔嵬自可兄呼石
憔悴直須僕命騷
尊酒論文復何日
西風迢遞暮鴻高

九日客至

有人車馬訪柴桑怪見寒花滿意黃莫對西山談世事
試將華髮照滄浪淵明不與白蓮社程子猶憐綠野堂
他日燕南話耆舊此回風味亦難忘

除夕

莫道春風室罄懸試看孤影伴頽然浮雲往事空千變
清鏡明朝又一年頭上無繩繫白日胃中有石補青天
幾時能了西山約六角黃牛二頃田

秋夜

已喜山深稱野情每慚無物慰諸生
貪日課不時睡
雞為誦音長早鳴病後端居信
張詠靜中未發有延平
誰知今日絕絃意卻恐人間知此聲

又

坐困沉思強起行
虛庭涼露下無聲
為爾寂寂人莫笑
不肯碌碌君何成
萬古興亡天亦老
百年身世夜難明
情知不為學仙去也欲蓬瀛寄此生

新厯

山家歷日年年有林鳥園花報四時建成預求尋藥月
逢辰要及種瓜期胷中堯典二三冊夢裏幽風第一詩
餘韻千年宛如在晴牕捲卷不勝悲

偶成

自覺筋骸老漸頑曾經堅脊度危關清霜烈日留身後
秀氣春風滿座間後有頽波知底柱莫教秋色避南山
雲鵬稅駕今無地羨殺江鷗盡日閒

放謠

莫道人生能幾何金銀宮闕亦無多垂楊流水輕風裏
碧落銀河暮雨過天地此身真逆旅雲山到處是行窩
九原喚起堯天老我舉一杯君試歌

野興

得意江山入酒尊乾坤英氣未沉淪莫思世事兼身事
不薄今人愛古人明月清風無盡藏野花啼鳥一般春
客來惟說烟霞好只恐先生醉後嗔

秋郊

行過青林徑欲還誰家茅屋在林間雲初湧出半含雨
風漸吹開微露山世味嘗來知懶貴物華老盡覺秋閒
天教勝境為詩敵未許幽人穩閉關

西湖

水竇深藏十畝煙賣書真欲買魚船數椽破屋已自足
四海虛名良可憐醉後不知清露下興來擬共白鷗眠
漁溪謾有當年志老去而今只愛蓮

對菊

迂疎不辦一身謀
髣髴空添四海憂
畫本流民今復見
詩家逃屋為誰留
黃茅安得千間厦
白布空歌萬里裘
政有南風曲中意
可能獨醉菊花秋

憫旱

農夫省雲淚亦乾
靈湫誰信欲生烟
萬金良藥汗猶出
一寸丹心天可旋
未便無食思樂土
不禁憂國願豐年
為瞻河漢中霄起
獨對殘燈理斷編

城樓待雨

雨入江樓勢欲吞雷轟何止語難聞未憂彼岸將為壑
只恐吾山盡化雲風伯為誰能卻敵物華依舊嘆如焚
百年人事今如此猛拍闌杆怨夕曛

溪光亭看雨

萬山齊擁白烟來木杪先聲失怒雷海岳奔崩換毛骨
乾坤收斂入胚胎龍公所蘊有如此塵世一清何壯哉
坐看神功空束手夕陽華髮對蒼苔

積雨

萬象何為入杳冥懸知物外自高明前年憂旱有今歲
半月閉門如一生捧日謾勞中夜夢補天誰識寸心誠
陰雲政使高千丈坐愛魚頭恐未平

秋霖

春旱泥倉恐謾傳誰從得雨得豐年麻衣有垢供秋藪
土銼無文換曉烟果為松薪禁明月真教斥鹵變桑田
胸中幾許晴霓在四海霖霖獨慨然

次韻閔雨

已酉豐山不偶然今年千里土生烟夢游樂國每嫌覺
闕見仙雲猶酷憐畢竟蛟龍思得雨何勞蟣虱謾呼天
山人萬慮消磨盡惟有憂農阻靜便

癸酉大雨次人韻

黑風吹海入天瓢誰信銀河直下潮渾沌只疑還太古
規模應欲復唐堯衣冠半夜方孤坐塵溷千年共一漂
且喜開簾見白日不須隴畝問秋苗

海南鳥

越鳥羣飛朔漠濱
氣機千古見真純
紇于風景今如此
故園園林亦暮春
精衛有情啣太華
杜鵑無血到天津
聲聲解墮金銅淚
未信吳兒是木人

白海青

一名王爪駿

扶餘玉爪舊曾聞
青鳥猶霑海氣昏
掌上風標有如此
眼中神駿更憐君
平蕪未洒頭鷺血
春水誰開獵騎門
過鴈昏鴉莫回首
霜拳高興在空雲

爆栗

山家愛客夜留連，奮發驚聞一栗先。
鑿竅誰言無渾沌，弄丸今喜得天全。
香甘合用金甌選，冷淡那容玉版禪。
回首燕秦幾陵谷，眼中繁富竟何年。

近世山家避粟
稅往往伐去

醉梨

白雪春香洗未殘，玄霜誰遣凍成團。
凍封圓顥盤增滑，蜜和濃漿齒避寒。
綠蟻從今忘病渴，金花無地著餘酸。
快人風味依然在，莫作尋常軟熟看。

飲江漢白

高亭飲興動江山為捲灘聲入座間糟麪真能釀滄海
魚龍直恐盡神奸
襄流謾說葡萄暖仙國曾分玉液慳
聞道兵塵埋楚甸一杯誰與洗愁顏

薔薇酒

顏色醪醕茉莉香琉璃到手會須嘗一杯滄海泡成幻
萬古花庵醉有鄉涼冷併收天水碧輕浮猶帶女真黃
錦囊盡貯春風在別是仙家不老方

服食家有
餌薔薇法

黃精地黃合釀甚佳名以地仙酒

仙家名品對差栽誰信幽人用物多酒面白雲招我在
杯中華髮奈君何西山秀氣斲欲盡易水寒聲釀亦和
未望天行至千歲舉觴當和紫陽歌

雲卧天行非予敢
議守一處和千二

百歲晦翁
調息箴也

玉柱雙清香

二氣元從太極分浮風起滅見來真白虹貫日豪華散
底柱中流意象新方寸有靈涵大塊頭顱無物隔蒼旻
藍田萬頃烟生玉未辨晴窓半穗春

心無外體無間
吾薰爐銘也

玉簪

花中冰雪避秋陽
月底陰陰鎖暗香
玉瘦每憂和露滴
心清惟恨有絲長
且留宛轉圓沉水
莫遣聯翩入粉囊
只許幽人太相似
蒼苔疏雨北窓涼

反垂柳短吟

偃蹇高松雪謾飛
最憐憔悴綠楊枝
青絲曾識鶯聲軟
黃葉俄驚馬足遲
有分只偷春色早
無心要結歲寒知
不應再得東風力
更與行人管別離

次韻劉尚書尊號禮成

萬姓瞻天仰泰階
老人星現五雲開
混同直擬千年論
積累無從百世來
含哺豈能逃帝力
有根無不待春雷
舉頭日近長安遠
葵藿傾心即壽杯

答或者以所注孫子見示

二首

學術兵農豈盡無規模
如此亦區區
權書不免增多口
霸論誰教混一塗
親手申韓如果有許身
管樂未全誣
千秋萬古中庸在
留與橫渠作後圖

晁公武讀書志有
橫渠少年註尉錄

子一
卷

誰遣歐陽筆有神微詞端不赦堯臣樵夫見笑寧無媿
童子羞稱亦可人但得躬畊全性命猶勝偏霸在風塵
蒟蒻一語宜深聽樓上元龍且莫嗔

次韻答范陽郭生

默坐誰窺樂境深無絃初不用知音曲肱睡起亦何事
弄月歸來徒自吟多媿寄書勤訪道未嫌傾蓋即論心
西山百里平如按欲認東州烟雨侵

次韻答趙君玉

萬古西山翠不休一庵今在白雲頭
開軒招月淡相對倚杖聽泉清可收
已喜凌空有高興豈知卧病阻同游

南湖燈火十年夢舊好何時得重脩

來詩有千品萬壑
春風動安得凌空

訪靜修之
句故及之

傳彥和壽予詩以韻答

遜世今成壁立山傷時時復井生澗
希夷老不留張詠康節初曾笑謝安
歲月如人雙鬢老江山分我一杯歡

因君喚起扁舟興擬畫臨流白帽閒

次韻答王之才見寄

瀟瀟霜葉打窓疏耿耿寒燈伴獨居鄉議謾評康節僻
後賢方識子雲書詩成已破三緘戒臂穩因思九折初
明日相望在何處青山佳處即吾廬

次韻答張夢符

癯然一榻卧成痕多病人疎自古云執別三年猶念我
開緘千里若逢君家聲舊仰遼東鶴才望今稱冀北羣

每憶琴尊前日雅幾迴搔首賦傳雲

寄張之傑

便擬庭闈捧檄過直須隨俗苦揚波一瓢有樂誰云細
三釜無歡亦謾多戰國遺風餘管樂南朝清議尚王何
見人時樣知吾拙獨誦滄浪太古歌

寄彥通

青芻白飯思悠然燈火山亭暮雨前不意相思渾百里
直教一別動經年久甘分席樵夫下敢望過門長者先

自是烟霞愛招客可無佳句助清妍

示彩鱗

相思擬話百年情燈火直須幾徹明
繼志未論班氏史隆師何用鄭公名
人間忠孝寧無責學術淵源先有盟
欲寄君詩仍感泣野夫能有幾門生

示有寄

南隣新膾北鄰醅莫忘蓮湖舊釣臺
根底自宜留故土
焰中真見有寒灰
短長無就相形看消息
當從既往推

遙想西城共登眺水光山色亦悠哉

付阿山誦

十畝荒田不自耕半空樓觀幾時成人因遇困方言命
我為求奇反喪名此去要知燈是火向來空指鴈為羹
新詩銘在山童口百過高歌告乃兄

送董巨濟尋親

花繞東隣竹馬鞭春隨西舍板輿肩白雲尚在棲遲地
綵服俄驚喜懼年樵爨定知生處樂兒孫多向老來憐

阿翁別後還家夢比擬思親恐未偏

送人官浙西

江海十年幾戰酣劫灰飛盡到畊蠶亂離文物想猶在
凋弊徵科恐未堪眼底興亡即今古胷中形勝欠東南
因君漸有扁舟興佇待清風洗瘴嵐

送人官吳中

天徹藩籬要混通古來佳麗數吳中送君如對秋風起
恨我不隨江水東五瘴何妨鄉土異孤雲須念母心同

畫圖留取風烟省莫越并刀一剪空

張仲賢宣慰淮東過余山中臨別贈詩庸見定

交之意云

昨夜相逢終夕話今朝送別百年情世緣盡付禪心在
官況併隨詩境清此日揀焚猶有望他年勇退豈無盟
知君苦愛希夷老莫厭山深不寄聲

郭太守提舉松江

蔡公聲望動江東應識頭顱肖外翁陵谷初經新化日

萼鱸不似舊秋風看雲正要忘憂計避瘴無如寡欲功
萬里吳松憑寄語并刀明日試胷中

贈韓道人

積學輸君氣稟真胸中鵬賦自凌雲靈砂換骨知何物
道籙降心亦謾云銅泣露槃經幾見鶴言華表竟誰聞
風流大父承平事賴有當年李少君

韓及識余先大父今百三歲矣

贈司馬道人

仙界清涼亦陸沉風流儒素渺難尋白雲自解留佳客

青帔端能爍壯心知已未論鵬鳥賦移人先聽水仙琴

野夫近有南來興乞我庵前十畝陰

司馬氏陵川名家陵川或謂清涼境

界

贈趙丈八十詩

并序

趙文字澤民金義宗初年應科中天律下第

一授商州知法尋除左部檢法遷新息令北

渡客順天中統初擢為左三部司正致仕景

州判官為人樂易寡默嘗與先人同應真定

宣撫司辟召故予以父執事之今年八十餘
里人好事者榮其壽諸公為賦詩而求余倡
焉

律學專門自可疑更從報施論心期干戈留在三章法
松菊歸來兩鬢絲再世通家惟此老百年涉世亦吾師
平生辦作者英序慚媿胸中毒域碑

都山劉丈九十詩卷

感事還悲負米身此生無復九齡親干戈誰共知年喜

天地猶全愛日真只擬商顏亦秦土豈期唐水尚堯民
胸中壽域平生在開卷題詩覺有神

嘗相士詩卷

形聲感物即天成善惡因心有相生人事百年隨反覆
天容一日幾陰晴僕夫茗椀何妨共廝役王門未可輕
不向訾家洲上醉胸中風鑑恐難平

題贈郗道人詩卷

開卷烟霞著真人紫芝瑤草憶芳尊法筵古禮存三代

野服遺風見一痕
唐水堯山猶樂國
葛洪張果有仙村
何時輦母東隣了
老婦烹茶自應門

哭申也

悲來思汝不可置
揮淚問余何所悲
青欲出藍今遽爾
白能受采復誰期
粥杯屢進知君篤
藥裹親嘗豈我欺
從此塵編只獨理
不堪燈火夜涼時

哭王之才編脩

草草離觴記去年
誰知此別是終天
傳雖成癖今安用

史未為榮應自憐四座高談宛猶在一經白首竟無傳
交朋日與來書少不過西州亦泣然

千戶喬侯挽詩卷

拱木秋聲尚凜然平生鄉國愧幽燕千家聚落即山砦
四海牢籠勅勒天龍虎風雲空一夢關河形勢記當年
重侯累將應須念創立艱難亦可憐

孫沁州哀挽

驚省哀誄為君傷一面十年不易忘秦府舊稱天下選

燕人元有北方強平生豪氣餘邱土寤寐神交只月梁
聞說條陳有遺草承家洗眼看髯郎



静修集卷十六